

Date – 09/06/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma'n leilung tichhe tlem zawnga ruahtui khawl khawm uar a tul a ti.
- 2. Dahkham ngai lova loan lak theihna, “Pradhan Mantri Mudra Yojana” chu kum 2024-25 financial year chhung khan mi sing 1, sang 4, 800 bawr vel hnenah pek chhuah a ni.
- 3. Prime Minister Narendra Modia chuan ramchhung mipui vaibelchhe 140 chuangten thahnemngai taka an thawhna leh an inpekna zarah kum 11 kalta chhungin ramchhungah hmasawna tam tak a thleng a ti.
- 4. Chhatisgarh-a Maoist helho bomb tihpuahah Additional Superitendent of Police a thi.



MIZORAM WATER INFORMATICS CENTRE

Chief Minister Pu Lalduhoma'n leilung tichhe tlem zawnga ruahtui khawl khawm uar a tul a ti a, Aizawlah phei chuan ruahtui dawn khawmna nei lo tur chu AMC-in insak phal tawh lo se tha a tih thu a sawi.

Vawiina Irrigation & Water Resources Department Auditorium, MINECO-ah World Bank sum hmanga din Mizoram Water Informatics Centre a hawnaah he thu hi sawiin Chief Minister chuan hmun 82 atanga tui data chi hrang hrang, darkar tina hrilh thei centre changtlung tak Mizoramin a nei ta chu lawmawm a tih thu leh, scientific lama hmasawna chhinchhiahtlak tak a ni tih a sawi a. Tui lam data mamawhtu department leh institution te chu he centre hi ring tlang a, data thuhmun hmanga hna thawh ho tha a tih thu a sawi a, State Centre neihchu central sawrkar lam duh dan a lo nih thu a sawi bawk a ni.

Chief Minister chuan mipuiten ruahtui khawlkhawm uar a tul thu sawiin furah tui an pump theih loh ni a thleng fo va, ruahtui tam tak dawng siin, mipuiten tui an nghei lek lek thin chu ruahtui dahkhawlna tha in tinin neih a tulzia lantirtu a ni a ti a, Aizawlah phei chuan ruahtui dawn khawmna nei lo tur chu AMC-in insak phal tawh lo se tha a tih thu sawiin, ruahtui dahkhawlna tha neih a tul hle a ni a ti.

Byte: Chief Minister Pu Lalduhoma

He hunah hian IWRD Minister Pu PC Vanlalruata pawhin thusawiin Mizoram Water Informatics Centre hawn a ni chu Mizoram tana ni chhinchhiahtlak a ni tih a sawi a, Water management lamah ruahmanna an neih nual thu te, tuihna tihpun dan hmun hniha an enchhin tawhte a hlawhtlin thu te, chumi ang hmanga Tlawng tuihna tihpun tum a, Bramaputra Board ah Project cheng vbc 70 chuang man an thehluh chu pawmsak a nih tawh thu te a sawi a, IWRD Minister chuan Rain Water Harvesting App a tlangzarh nghal a ni.

Mizoram Water Informatics Centre hi Mizorama tui kaihhnawih hriat tur pawimawh zawng zawng hriat theihna tura ruahman a ni a. Lui tui luang zat, ruah tui tla zat, boruaka tui hu awm zat, lei hnuaia tui level leh sik leh sa lam data an neih theihna turin hna a thawk dawn a. Mizoram hmun 82 ah heng data lakkhawmna hmun hi bun fel vek tawh a ni a, centre-ah hian darkar tin data an thawn thin dawn a. He centre kaltlang hian Mizoram Water Resources Information System leh Tuilian Warning System pawh siam a ni.

<><><>

VKSA

Tunlai mila Kut hnathawh hlawk tura inzirtirna beihpui thlakna Viksit Krishi Sankalp Abhiyan (VKSA) chu Mizoram khaw 700 chuangah kalpui mek a ni.

Agriculture Directorate-a Joint Director leh VKSA Nodal Officer Pu B. Ramnunsanga chuan Viksit Krishi Sankalp Abhiyan in a tum ber chu loneitute hnenah an thlai leh ran vulh te a lo pun theih nan an hriat tur tul ang zawng zawng an hrilh ang a, loneitute hnen atangin an mamawh leh an harsatna an zir pah nghal dawn a ti a. Loneitute hnenah an thlai chin kawngah leh an mamawhna hrang hrangahte an hriat tur tawngka leh ziakin anmahni hmun ngeia va hrilh hriat a nih thu a sawi a ni.

Byte : VKSA Nodal Officer Pu B. Ramnunsanga

Sorkar laipui chuan ram pumah buh leh bal tharchhuah a lo pun theih nan Fur (Kharif) leh Thlasik (Rabi) ah te beihpui thlak tura hma a lak angin, Thlai chin hmaa loneituten an hriat tur ang an hriat theih nan Mizoramah chuan May ni 29 atanga June ni 12 thleng VKSA hi neih tura ruahman a ni a, thlasik thlai (Rabi) chin hma in October ni 1 atanga ni 15 inkarah VKSA campaign hi neih a ni leh dawn bawh a ni.

VKSA hi Champhai District chhunga khaw hrang hrang Ngur, Zote, Bethel, Zokhawthar, Melbuk, Mualkawi, Vaikhawtlang, Khuangphah leh Hnahlan ah te KVK Champhai District, Khawzawl leh Agriculture, Horticulture leh Veterinary Sciences Department te leh Agricultural Technology Management Agency (ATMA) a mithiamten ten vawiin khan an chhunzawm leh a ni.

He campaign hi team 3 a insiamin District tina KVK a Subject Matter Specialist (SMS) te chu team leader an ni a, team tin te hian nikhatah khua 3 zel an flawh chhuak a ni.



PMMY

Dahkham ngai lova loan lak theihna, “Pradhan Mantri Mudra Yojana” chu kum 2024-25 financial year chhung khan mi sing 1, sang 4, 800 bawr vel hnenah pek chhuah a ni.

Akashvani Regional News Unit-in Pradhan Mantri Mudra Yojana (PMMY) kum 10 tlinna puala Bank hrang hrang hotute a kawmnaah, PMMY hman tangkai a nih thu hi an sawi a, Mizoram Rural Bank, Kolasib MRB RSETI, Director C. Laldampaia chuan Sorkar laipui PMMY tum lian pui pui 4 a neih thu a sawi a- mitin huap banking service siam a ni a ti. Mi in sum a thawh chhuah theihna tura chhawmdawlina pek, mitin in midang pur lova anmahni kutke a an din theihna tura pawisa tlem te an lo neih theihna tura ruahmanna siam leh bank ah pawisa an duh zat ang lak theih loh avanga pawisa pukna kalphung awm hran lova mi hausa zawk te pawisa a pung awm puk sakna thleng thin tihbo chu a tum ber a ni a ti.

Byte: Pu Dampaia

Mizoram Rural Bank, Manager (Advances), Freddy VL Muanpuia Fanai chuan PMMY chu ram mipuiten an tangkaipui hle a ti a, PMMY hnuaiah ram pumah mi vbc 23 chuang hnenah loan cheng vbc nuai 22, 662 vel pek chhuah a ni tawh tih sawiin PMMY chu chi thuma thliar a ti a ti a, cheng sing 5 thleng loan lak theihna - Shishu, cheng sing 5 atanga cheng nuai 5 thleng loan lak theihna- Kishor leh cheng nuai 5 atanga cheng nuai 10 thleng loan lak theihna Tarun ah te then hran a ni a ti.

Sorkar laipui pawhin ram mipuiten hamthatna an dawn nasat zia a hriat avangin 2024-25 Union Budget ah cheng nuai 20 thleng loan lak theihna Tarun+ dang an duang leh tih a sawi a. Mizoram mipuite pawhin PMMY hi an tangkaipui hle tih sawiin kum 2024-25 financial year chhung khan mi sing 1, sang 4, 800 bawr vel hnenah PMMY loan pek chhuah a ni tawh a ti a, loan latute chu sorkar guarantor ah a tan avanga inthlahdah mai lovin, loan an rulh that loh chuan loan dang an lak leh theih loh phah thin avangin loan rul tha turin a chah a ni.



BJP MIZORAM-11 YRS NDA

BJP State President Pu Vanlalhmuaka'n Mizorama hmasawinna tha leh rotling neih mek te chu Prime Minister Pu Narendra Modi-a kaihhruaina hnuaia an hmuh te a ni a ti.

Vawiina BJP Mizoramin kar thar Inhlanna leh Political Session hun an hmannaah he thu hi sawiin, BJP State President Pu Vanlalhmuaka chuan Pu Modi-a kaihhruaina hnuaiah Sairangah Rel a lo lut thei ta a, Double Lane tha tak tak laih mek a ni bawk a, Aizawl Traffic Jam tih ziaawmna tur, Aizawl By-Pass Road atan pawh Mizoram chu sum pek a ni tawh a, hna thawh mek a ni a

ti a, BJP Sorkar hnuah Mizoram chuan Infrastructure Development nasa takin dawng a ni a ti.

PM Scheme kaltlanga mi retheite'n hamthatna an dawng tur chu a nihna anga hman a nih thin loh avangin, vawiin thlengin mirethei te leh mipui PM Scheme chhawr thei ten a nihna ang takin an chhawr thei thin lova, a bikin 'Housing For All' hmanga In sak tanpuina dawng te'n an la sa zo thei lo tih a sawi a. Heng zawng zawngte thlir hian Mizoram mipuite harh a hun takzet a, Mizoramah BJP-in Sorkarna an chan loh vanga an chan tur ang an chang theilo thin chu pawl a tih thu a sawi a ni.

<><><>

MNF MLA

MNF MLA Pu H Lalzirliana'n Mizoram sorkarin Petrol leh diesel chhiah a tihsan chu rum vawng vawng na tham a ni a ti.

Vawiina Mizo Hnam Run chhung inkhawm leh Political session a thu a sawinaah, MNF Adviser ni baw, Pu H. Lalzirliana chuan thusawiin, ZPM kaihhruai sorkar in Petrol leh diesel atanga chhiah nasa taka an tihpun, kawng siamna atana hman tur an tih chu engzat nge an hman tawh tih hriat a chakawm hle a ti a. Mizoram kawngpuite, hmun tinah a chhe em em vek a, National Highway chhiatlai ber a thleng mek a ni a ti a, mipuiin harsatna namen lo an hmachhawn mek a ni a ti.

Tuialhthei atanga chhiah lak tihsan hian lirthei nei ve lote leh mirethei zawkte nasa takin a nghawng vek a ti a. Kum 20 chuang OIL industry-a a thawh ve chhungin India ram khawi hmunah mah hetiang taka chhiah tihsan hi ala hre ngai lova, nitin mamawh man nasa takin a san phah a, miharsa zawkte tan rum vawng vawng na tham a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan ramchhung mipui vaibelchhe 140 chuangten thahnemngai taka an thawhna leh an inpekna zarah kum 11 kalta chhungin ramchhungah hmasawna tam tak a thleng a ti. Vawiin khan Social Media ah he thu hi tarlangin Pu Modia chuan NDA sawrkarin chak tak leh zau takin hmasawna a thlen tih a sawi a. Eibar zawna kawnga hmasawna mai bakah khawtlanga mi hnuaihngungete chawikan kawngahte, mipui awn hmasawna kalpui a ni a ti a. NaMo App kaltlangin video, infographics leh article kaltlanga India hmasawna te lo thlir ve turin a ngen a ni.

<><><>

NAXAL

Chhatisgarh-a Maoist helho bomb tihpuahah Additional Superitendent of Police a thi. Thudawn danin tukin khan Sukma district-a Police Patrol te chu Naxal hel ho hian bomb hmangin an lo bei a. Dondra khua kianga Konta-Errabor kawngah Naxal ho bomb kam hi police te hian an chil puak a ni. A hmunah ASP (Konta) Akash Rao Girpunje chu a thi a. Police dang engemawzatin hliam an tuar a ni.

<><><>

NDA @11 YEARS NE

Kum 11 chhunga NDA sawrkar chhungin hmarchhakah hmasawwna tam tak a thleng a. Tun hmaa ram kilkhawr tak ni thin chu tunah chuan inkalpawhna leh hmasawwna entirtu a ni tawh a. Kum 10 kalta chhung khan Act East Policy hnuaiah leh Prime Minister Narendra Modia kaihhruaina hnuaiah tun hmaa ngaihthah ni thin hmarchhakten hmasawwna kawng an zawh nasa hle a. Hel leh tharum thawhnaa khat thin hmunahte inremna ziahpui an ni a. Tunhnaiah Assam leh Arunachal Pradesh te chuan ramri buaiah inremna an ziak tawh bawk a ni. Inkalpawhna pawh nasa taka hmasawwnin greenfield airport 10 siam thar a ni a. Mizoramah relkawng siam thar a ni bawk.

<><><>